

Dour binniget

131

162

War he zal gwenn, pep furnez,
War he dremm kaer, levenez,
Eur zell dispar ;
Kement he gwel o tremen
A lavar : — Eur berlezen
Dianket war hon douar !

Eur mousc'hoarz da beb-unan,
Da goz, yaouank ha bihan,
Seder, kompouez ;
Eus a bep tu, meulodi,
Adalek ma teu, dudi,
A-beurz an holl, d'ei ar vouez.

D'ar zul, pa deu d'an iliz
A-hed traouien leun a c'hliz,
Rozen veure !
N'eus komz hag a zisplegfe
He gened, nag a larfe...
Komz abed en neb doare !

An heol a-us d'an draouien,
Evned gan o c'hanaouen,
Bleuniou, dour-red ;
Eun heiez o kerzet skauv
Dindan seurt mintinvez hanv,
Tensor kalon ha spered.

Eun devez en ti Doue,
— Kalz amzer nijet aboue ! —
En toull an nor,
Hi o tont, me o vonet
Dirag an dour binniget,
Ha dorn pep-hini digor.

Hi a chom eun tamm a-zav,
Strafilh ouz pez en em gav ?
N'eo ket, hep mar !
Me a ginnig dour d'ezi,
Hi a bleg d'am bennozi
Gant sell dous helavar.

Hag ar zell-ze a welan,
He zell, eur zell ar gwellan,
Sell a c'hlanded ;
Ha sonj an dour binniget,
Pell a zo d'ei kinniget,
A vag c'hoaz evurusted.

Evurusted hag envor
Eur plac'hig eus an Arvor,
Karantezus ;
Tener taolen evelse
Sonjho peus a gement-se,
O mare'hig ken mousc'hoarzus ?

Evurusted hag envor
Eur plac'hig eus an Arvor,
 Karantezus ;
Tener taolen evelse
Sonj ho peus a gement-se,
O merc'hig ken mouse'hoarzus ?

EOSTIG